

Kisikna le **Maisakna****SABBATH NITAAK**

**Tu Kaalsung Simding:** *Isa. 61:10; Hosea 6; Sawl. 3:18, 19; Pai. 34:1–10; Rom. 6:23; Matt. 22:1–14.*

**Kamngah:** “I mawhnate pulak lehang i mawhnate hong maisak in i diktat lohna khempueh pan hong sawpsiang dingin amah muan huai in a dik hi.” (*1 John 1:9, ZSV*).

**I**srael mite in meikhuaam nuai ah giahphual saat in om uh a, Kam ciam Gam zong amau a dingin gamla mahmah bang ahi hi. Ni tam pi laipek panin Moses in tua meii in a khuheip mualtung khuamial sungah va kahto khin hi. Tua mualdawn pek ah gilkiial dangtak le mei kuang peuhawh sikhin zo phial ding hi ci uhhi. Tua mi honpi in tua munah om nuamsa nawnlo in bawngnawi le khuaizu a luanna gamah lutta dingin kiging ngeingai uhhi. A sawtnailo khatin tua mipi in Pasion’ thu ka mang ding uhhi ci-in thuciamna kip khat abawl uhpen mangngilh in, amau’ muhtheih lim khat bawl nuam uhhi. Amau ading in lim khat a bawlsak dingin Aaron giahbuk kiimah hong kikaikhawm ngeingai uhhi. Ama’ nunna a ding launa tawh Aaron in thukimpih hi. Adahhuai hih thupiang teng Paikhiatna 32-34 sungah om hi.

Hih thupiang pen, tukal sinna thubulpi; mawh kisikna le mawh maina hilhcianna Lai Siangtho sungah tangthutom khat bek hipan hi. Nisim sinnate nasim suksuk kawmin tukal kamngah mahmah na lungsim sungah omsak den in. Mawhnei hinapi hang in, sing lamteh leh hotkhiatna ngiimna tungah lungdam un; tualai ah mawhna pulak te a dingin mawhmaina om tawntung hi.

\*June 6, Sabbath ading kiginkholhna in tu kaal lesson sim in.

## Nawhtat Nuntakna

Manlah mahmah kaal khat hi. Hi nu in Sabbath hong tunma in a sepding tampi om cih thei gige napi, a thupi na khat pen, thu-kin khat hangin, tua nun'n nitumlam phawk kha nawn lo hi. A innkuan un nitak anlim a nopnek mahmah khit uh ciangun biakpiakna bawl uhhi.

Sabbath zing tho baihle, atuibuuk sung niin lua ahieh man in hong nawtsiang pah hi. Tapa no in zunteh ahieh manin a delhphah pen puan dangte tawh puansawp set sungah denna pah leuleu hi. Inn kuan ading zing-an ding hong bawl ciangin, sunsiah ading a khum omlo cih hong phawkleuleu ahieh manin; manlang takin nahtang- khomun pawlkhat hong em saisai hi. A lawmpa' Sabbath puan kizuut nailo hong muhteh, zuutsak in, puan dangdangte zong khepsaisai in, niin bung zong hongpaai hi.

Tua ciangin, *Tuni ka it mahmah Sabbath ni hiven! Kei lah innsung na kisamteng na semsem keei pongmawk vengin, Sabbath ni in Pasion tawh kinaih nadingpan ka lungsim a vaakthak sak kahi tave cita hi.*

Thu hong ngaihsun in, ama' gamtatna teng thutang suaksak a: sep dingteng vive mah hi e cih. A hitakpi mah maw? A gamtatna teng pen Martha tawh kibang in: "an-vaakna ding tawh lungkham lua" (*Lk 10:40*) kisa ta hi. Zeisu' kammal khat a lungsim sungah hong lutvat hi. "Nang na lung hihmawhna tam hi. Na kikap taktak khat bek om a, Mary in tua a kizam na pen a semsem ahieh manin, tua a nasep ama' kiangpan kilaakkhiat saklo ding hi" (*Lk 10:41, 42*) aci hi. Thu hoih ahi hi. Itna tawh Zeisu' khephung ah tut ding, Sabbath ni bek hilo, nisim in tut ding ahi hi.

Amah'n Pasion it hinapi'n, kikhawlhna a khauhtheihna dingin Sabbath hun a piak pen mangngilh kha hi. Anbuk sungah a tutkawm in a mitte panin khituute gamdai takin hong luangsuk gelghelg hi.

Hih thugentehna deihna bulpi in, Sabbath ni-in sepding, seplod ding cihte hizawlo a; Pasion tawh kikhawlhna hong thanemsak, hong kitatsak theite i phawk ding kitheih sakna hizaw hi. I lungtang in mawhna tawh nasa in kigamla i sak ciangin Amah sam leng Zeisu in anaino in omgige hi (*Late 53:2*). I' kisikna khituute Amah'n mu-a, i' puan niinte hong suahkhiat sak hi. Lam tawntung in Ama' puanpaak tawh hongtuam cip hi. Ama' siangtho'na in i' mawhna teng avek in picing takin hong sikcip sak hi. I puante Ama' sisan sungah sawpthei ta hi hang (*Mang. 7:14*).

**Isaiah 64:6; Zechariah 3:4; le Isaiah 61:10 in eite ading Khazih' dikna a thupitna koici pulak hiam? Hihteng ah hong kamciamna tungah banghang in kiptakin pom tawntung ding ihi hiam?**

## Kha Siangtho in hong Phawkkik sak

Amah le azi kikal kigamlaatna teng a ngaihsut ciangin, amah khial bel kisa hi. Amah ngongtat luakha khin in a paukhiatsa pawlkhat bang kisikkik zawzen hi. Ngaihsun phapha in “Ama thuak ding mah hilel e, tawmbeek e!” cih.

Tua bang ngaihdante na zongsang lel hiam? Thuumkhit ciangin zong eima’ ngaih dan leh paulamte pen olno takin kikheel ziauthei hi. “Dahmah si’ng” cihziau ding pen haksa mahmah hitaleh, hihkhialh a om ciangin, kikhawlhna puahphakik in thahatsak kikna dingin a kisas mahmah thu ahi hi.

Pasian tawh zong tuamah bang ahi hi. I bawlkhak mawhna te pen Kha Siangtho in hong phawkkik sak zel hi. Tua phawkkik sakna hangin lungsimte hong khoihkha hinapi, eileh eimah iki diksak laitak mahin, tua aw neuciauciau pen ki awlmawhlo kha thei hi. Kha Siangtho’ maapanna khatpen “leitung mite’ mawhna lah” (*John 16:7, 8*) hi. Pasian hong silpiak uphuai keiliang e (*Luke 11:13*). Pasian tawh tonkhawpna ah hong piangkha ki gamlaatna te, puahphat theihna dingin phawktheihna in thupi mahmah hi.

### **Simin,** Hosea 6 simin. Pasian in kisik ding hong cihcih laitak in Amah mah koibang in hong kipulaak ci hiam?

Eite, Lengguipi tungah hong kipehkik sak Kha Siangtho maapanna lungngai kik in (*John 15:4*). “Eima gamtat siatna hangin, a deihhuailo sulzuite a dingin kidah zel hinapi; tua in kisik kikna hilo hi. Mawhna hangin dah taktakna pen Kha Siangtho’ nasepna ahi hi. Hon-pa a khasiasak lungsim’ gitnatlohna teng Kha Siangtho in hong lahkha in, kisikna tawh singlamteh phung hong tun hi. Mawhna malsim in Zeisu liamsuah hi. Amah a gimsak eite mawhna hangin kidah mahmah hi. Tua dahna in mawhna nutsiatna lamah hong makaih hi” —Ellen G. White, *The Desire of Ages*, p. 300.

Pasian le eimah kikal ah teeltuam zongsat mawhna a om peuhmah le kikhawlh na khangto theilo hi. Kipicing thei ngeilo hi taleh – lungsim sungah Kha Siangtho hong lut ciangin mawhna kisik teitei kul hi (*Eph. 4:30*).

**Kisik kik dingin sapna leh taaina na zak nunung pen banghun hiam? Na koici dawnthuk hiam? Hun tawmno la inla, tukul sungin Ama’ kammal sunga Ama’ aw za dingin nabil dawah inla, Pasian in damtak in hong hopihna zathei dingin thu ngen in.**

## Kisikna Taktak

Leitung paizia in suahtakna, angkhualna leh kiliatsakna cihte vive tawh hong buai sak mahmah hi. Tuatē pen Pasiān' hongsapna sila din mun le kiniāmkhiatna cihte tawh kilehbulh kilkel hi (*Matt. 5:5*). Lai Siangtho in Tuiphum John' kammal ana ciapteh masakna zong tua mahbang ahi hi. John in “vantung gam hong naizo ahih manin na mawhnate uh kisikkik un” (*Matt. 3:1, 2*) cihi. Zeisu in zong, “A hunhoih hong tungta a, Pasiān uk ding hun hong kipan ta hi. Na mawhna uh kisik unla, hih lungdamthu umun” (*Mark 1:14, 15; Luke 24:46, 47*) cihi. Zeisu le John in amau' thungai mite kiangah vantung gam naizo ahih manin mawh na kisik ding samkhawm uhi. Hih thupwak in tuni eite tawh a kipawl thei ding hiam?

**Simin, Sawltak 3:18, 19. Khalam khantohna dingin banghang in mawh kisikna phamawh sese hiding hiam? Thathak guat ding hun acih banghiam?**

Pasiān dikna le hoihna in kisikkikna lamah hong makaih hi (*Rom. 2:4*). Mawh kisikna cialnih om hi. (1) ei' mawhna ading nasak tak tak na, (2) mawhna nutsiat ding khensatna taktak. Lai Siangtho sungah ahiehleh kisikna leh maisakna kizompah hi. Aman takpi in kisik leh; Pasiān in maisak hi (*1John 1:9; Mang. 3:19*). “Mi pawlkhate ngaih sut bangun, i Topa in a kamciamna a hong tungsak hak hi zenzenlo hi. Note khatbeek in siatna na thuakkhak dinguh deihlo in na vekpi un nakiksik dinguh adeih ahih manin; hong pai nailohna pen note hong khualna hizaw hi” (*2 Pet. 3:9*). Nihveina hong paina dingin i' khaciat kigin kawmin, Pasiān in Amah tawh kilemding hun hong piakna hi.

Eite i kisiktheih nadingin, Zeisu in thuakin, si in thokik a, hong hehpihna in i nunna sungah na lamdang hong bawlhthei lua hi. Leitung in i' om bangbang lemlē mah e, cihbang hilo in Pasiān in kisikkikna le upna tawh Ama'kiang zuatding deih hi (*Sawl. 20:21*). Ama' teci i pantheih nanging, Ama' hoihna suun dingin zuunsak dingin Ama' khut sungah ki-aap ding hihang (*John 15:2, 8*). Tua cihleng kisik kikna sungah khangto in gah gahthei ding hihang (*Matt. 3:8*).

“Kipuahphatna omlo kisikna in, kisikna citak hilo hi. Khazih' dikna in mawh a pulaaklo leh a nusialote' a ding puantungsilh hilo hi. Tuapen nundan thukhun khat hi a, gamtatna puahpha in tathlehkek kemcing hi” —Ellen G. White, *The Desire of Ages*, pp. 555, 556.

**Kisikna in nuntakna hong tun (*Sawl. 11:18*) a, Pasiān tawh kikholhna ah khantohna'ng thu khat ahi hi. Kipum-aapna, kisik na le Pasiān kizuunsakna cihteng pan, nang a ding koipen in hong topha pen hiam?**

## A Kicing Hehpihna

Eima' mawhna vangikpua in, singlamteh phungah Kha Siangtho kimakaih sak ciangin, "Topa dikin hehpihna tawh kidim a, hehhak in a lianmahmah itnakip tawh akidim hi" (*Late 103:8*) cih thei in; Pasion' hong maisakna ngen in. Hih mun mahmah pen Pasion Ama' teeltuam mite in a khasiat sakkhit uh ciangin, Amah ngiatin a paukhiat (*Pai. 34:6*) ahi hi.

### **Simin, Paikhiatna 34:1–10. Bang thumaan thupi om hiam?**

Topa in hehpihna tawh kidim, hehhak, a hehpihna in a zaihuamna in, eimah leh Pasion kikhawlhna a hoihsak kik dingin, singlamteh tungah Zeisu hong sihna thu mah ahi hi. Mawhna phawk in i pulak ciang in Aw Topa hiah om ing "Kei mawhnei hong hehpih in" (*Luke 18:13*) icih ciangin; eima' sapmaa nangawn in a Kha Siangtho tawh eima a ding a semsem khinsa i Topa in eima' vangik hong muhsak in hong hepkhiatsak hi.

Calvary ah i' vangik teng hong laptoh sakkhin a, Amah kiang i kuat ciangin Zeisu in hong nai om mahmah hi. Tuucing hoihpa in hong zong niloh a, kongkhak ah dingin hong kiu hi (*Mang. 3:20*). Pasion gal-et lepeuh dingin singlamteh kiangpan gamla om sedah ni maw. Zeisu' kiangah tai vingveng in eima' vangik teng le Ama' dikna kheek ni (*Zech. 3:4*).

**Anuai-a munteng damtak in simin. Nang ading Pasion hehpih na a pulaak teng nangma' kammal tawh gelhsuk in:**

**"Mawhna' thaman in sihna hi a, ahi zong in Topa Zeisu tawh kipawl manin Pasion hong piakkhong pen tawtung nunna ahi hi" (*Rom. 6:23*).**

**"Khialhna a tamna mun ah Pasion hong hehpihna lianzaw zel hi. Mawhna thahatna in hong sihsak mahbang in, i Topa Zeisu Khazih hangin Pasion' hehpihna thahat zawlai a, mi hoih in hong sangin nuntak tawtungna sung hong tun hi" (*Rom. 5:20, 21*).**

**"Eite mawhna nei i hih laitak in, eite a dingin Khazih hong si ahih manin Pasion in eite hong itmahmahna thu hong lak khin hi" (*Rom. 5:8*).**

## A Manpha pen Puanpi

Puansilh nikten hoih cihte peuhmah in leitung dinmun honglak hi. Mi pawlkhat in “Keimah kua kahih pulaak na’ng in puansilh ing” ci uhhi. Ahihhang vantungah ahihleh eima kikhawlhna teng mual mang lel ding hi (*Matt. 6:19-21*). Eima’ mimal ciaptahna pen Zeisu’ puan tualpi picing sungah kituuncip ding hi.

**Simin, Matthew 22:1–14. Zeisu hong gen thu gentehna hilhcianna bang namu hiam?**

Puan silhlo mipa pen Zeisu in “lawm aw” ci a, a langkhat lampan dawnkikna a om mello hang kikhawl ngei cih hi limlim hi. Tua mipa in tua puantual thei gige napi silh nuamlo hizaw hi. Zeisu’ omzia in picing in melhemlo hi. Topa in “puan hoih mahmah siangin a paak mahmahte ama’ silh dingin kipia” (*Mang. 19:8*) a; “paubaanna, tonna cih bang a omlo” (*Eph. 5:27*).

Tua puanpak pen “aituam Honpa in Zeisu i saanna tawh upna tungtawn in hong kipia Khazih’ dikna, paubaanglo Ama’ omzia ahi hi” —Ellen G. White, *Christ’s Object Lessons*, p. 310.

Adam le Eve in a mawhmaa un puanpak neeldikdek silh uh a; a mawhkhit uh ciangun, guaktang ahihlam uh phawk uhhi (*Pian. 3:7*). Tua ciangin amau’ khuitawm thei the puan pen Pasion in lakkhiat sak in, gan’vun puan tawh lahsak hi. Amau’ puansilh theihna dingin kipiakkhiatna khat omkha hi. Tu mahbang in, Zeisu hong kipiak khiat na pen eite’n Ama’ dikna puantual tawh kisang hi.

“Tanguak in zum uh a, vantung puanpak munah, amau’ khuitawm theiteh puan hong silh tamai uhhi. Mihing in amau’ mawhbaanglo dinmun pen bangmah tawh bawl dam zo nawnlo uhhi. Khazih leh vanmite tawh Tuuno mopawi ah a tukhawm ding mite in theiteh puan peuh, leitung puansilhte peuhmah silh theilo ding uhhi. Khazih hong tuamna puan bekmah in Pasion’ maiah hong tunzo bek ding hi. Hih puantuum, Ama’ dikna ngiat pen, a kisik kha te khempeuh tungah Khazih mahin silhsak hi” —Ellen G. White, *Christ’s Object Lessons*, p. 311.

**Ngaihsun dih: Ni simin Zeisu’ dikna puan silh ding i tel ding hi. Hih in taktak in bang a cihna hiam, hih pen bangci bawl ding i hi hiam?**

**Ngaihutbeh Ding:** I' khalam dinmun lahkhiatna dingin Lai Siangtho in loxhawhna tawh gentehna pia hi. Hosea 10:12 sunga pen tukal a dingin gentehna thulu khat hi photphot hi:

“Dikna vawh inla, itna kip at in.

Na lothak kal in.

TOPA zon ding hun hita hi. Amah hongpai in,

Amah hongpai in na tungah dikna guah hong zusak ding hi”

Eite'n, leisakna mun kalkham in, khaici tuh in, aat in Pasion kianglam i zuan uhhi. Eima' lungsim leitang pen Kha Siangtho guah hong zukna dingin kisasak ding hihang. Pasion in leitang puahphat nopna lungsim hong guanthei a, Pasion tawh kikhawhna hang bek ahi hi (*Phil. 2:12, 13*). Amah' lamah lu hei ding hanga, Amah baan in pom ding hi hang. A zomteng Amah'n hong semlel ding hi.

Pasion pom bikbek in omna lim khat pen: “Na mit un Topa hihna Baalpeor ah mu khin hi. Na Pasion un note lakpan in Peor ah Baal a zui mi khempeuh susia hi. Ahihhang in Topa na Pasion uh a lenkip te khempeuh tuni in na hinglai uhhi” (*Thkna. 4:3, 4*).

### **Kikupding Dotnate:**

❶ “Ze-etna hong thuaksak ke'n, gilopa kiangpan hong honkhia in” (*Matt. 6:13*). Zeisu in hibang lianin thungen dingin nungzuite hilh hiven, eite'n eleh, nisim thu ngetna ah hibang in i ngen beek hiam? Ze-etna leh mawhna pan hong kepna dingin thu nan gen tawntung beek hiam?

❷ Khristian ahilo khatpeuh, thu umlo khatpeuh kiangah Khazih in hong piak khong dikna puantual' thu koibang in na hilhcian thei ding hiam?

❸ Mawh kisikte Pasion' maisakna leh siansuahna thupuak ahi Khazih' dikna puantualpi leh biakbuk koibang in na kizomsak thei hiam? Hih thupiak a hoihna le a picinna bangzah na telcian hiam?

**Tomkaihna:** Kha Siangtho' phawk sakna zui-in i mawhnate kiphawkna le kisikna tawh kipiakkhiatna pen Pasion tawh kizopna i neih nadingin a thupi mahmah thute ahi hi. I mawhna khempeuh a vekin maisak hi cihleh Zeisu' dikna puan tawh kituam hi cih i theihna in mihing khat adingin kikhelna thupipen thupiang ahi hi. Mawhna gikna kikhia bek hi loin, Ama kiang i naih semsem ciangin Pasion' itna in i kiim i kiang a tuam hi. Hih in Pasion tawh hong kigawm sak a, kha lamah hong thahatsak in, i pumpi khempeuh tawh amah i itding hongphul hi.

## Bel khat ah Aw ging khat Pau

Zambia gam a kum 41 a pha nu Miriam cidamlo hi. A lu na sa in, a pumpi zong damlo hi. A lungsim sungah dahna lianpi tawh kidim hi.

Lungsim lungkhamna tawh, Livingston khua-a ni sagih sung lungdam na thuhilh kikhopna kipatna zan ah amah pai hi. Kikhopna ah, Majorie a kici SDA numei khat in amah lawm in nei hi. Miriam in a lungtang gimna teng pulak khia-in thungetna ngen a, Majorie in amah thungetsak hi.

Tua khit thulamdam khat a piang hi. A zingciangin, sun nai 11 hun-in Miriam in a inn pua-ah thuk tungah vaimim bel khat suang hi. Zambia mite tampi in, gam bup meivak kicing lohna hangin inn pualam ah thuk bawl in an huan uh hi. Tua laitakin, aw khat in, *Tu-le-tu in pai inla Lai Siangtho va sim in. Na bel nusia inla Lai Siangtho sim in*, a ci aw za hi.

Miriam in Lai Siangtho bang simding hiam cih theilo hi. Inn sung lut in, a Lai Siangtho lem' in, a muh masak pen simding a khentat hi. Ama'n lamdam sa hi. Pasion in amah tawh teltakin a pau bangin a kisa hi.

Ama in Lai Siangtho khak-in, inn pua-a an huan a zo hi. Tua ciangin amah kilehki a, khen dang khat a sim beh hi. Pasion in amah a hopih tawh kibangin, "Kong it lai mah hi cihna thei hiam? Ka deihna bangin nungta in," ci hi. A lungsim sungah lungdamna kidim hi. A pumpi natna te le, a lu natnate bei hi. Amah khukdin in, "Pasion aw, hong maisak in," ci-in thu ngen hi. Miriam pen nitak lamin lungdamna thu kikhopna ah vakin kileh a, Majorie kiangah tai phe-in thupiangte a gen hi.

Miriam in zingsang nai 11 in Lai Siangtho simdingin ahilh aw a zakna thu Majorie in a theih ciangin a khi'tui luang hi. Tua laitakin, amah in a inn ah Miriam adingin thunget ding lunggulhna nei hi.

"Ni simin Lai Siangtho simna hun zong in, hun khempeuh ah thungen gige ding manggilh kei in," Majorie in a ci hi. "Lai Siangtho le thunget na in khempeuh adingin thupi pen hi."

Miriam in Lai Siangtho sim le thungen den a pat a kipan kha tampi khengta hi. A lu nat le a pumpi natna beita hi. A lungtang sung a kidim ngei dahna khuamial pen ni tang bang lungdamna le Pasion ading nuntak nading lunggulhna taktak tawh kilaihta hi. "Lai Siangtho in tha hong pia hi, Pasion in Lai Siangtho tawn in nasep sem hi. Dawi in buaina hong piak nopleh, Lai Siangtho sung a kiciamnate len in thu ka ngen hi."

*Hih tangthu in SDA Pawlpite 'I Will Go' strategic plan sunga 'Mission For All' tupna lak*



*hi. Tua sungah, 'Khazih in mite tawh kithuah in, lainat na lak a, a kisapnate uh huh-in, muanna ngah khit ciangin, amah zui dingin mite zawn hi' ci-in kigelh hi. Tupna in mite tungah taktakna tawh lunglutna neih ding, amau Khazih kiangah piina, leh nungzuite a bawl khia Khazih nungzuite hihna tawh SDA Pawlpi tawh kigawm khawm dinga zawtna ahi hi. IWillGo.org ah tamzaw simin. [bit.ly/Miriam-IS](http://bit.ly/Miriam-IS) ah Miriam' YouTube video tomno khat en in.*

**Khen I: A Huamin Etna****Thubulphuh:** *1 John 1:9***Lungngaih Ding:** *Pian. 3:7, 21; Pai. 34:1–10; 1 John 1:5–10; Isa. 61:10; Hosea 6.*

Tu kaal lesson in nung kaal a kisin mawhna thu daw' kikna hi. Nung kaal in mawhna i neih na in lamet a bei' zia en hi hang. Tu kaal ah mihing dinmun Pasion vaansak na thu en ding hi hang.

Mihing in mawhna a bawl khit uh ciangin Pasion in vantung ah om ziau lo, ei hong awlmawh lo-in omlo hi. Pasion Tapa Zeisu penhun acin' ciangin mihing a honkhia dingin mihing in hong om hi. Pasion pen a Tapa tungtawn in ei' mawhna hang in hong si hi. Khazih in ei hotkhatna dingin singlamteh tung ah thaman piakhin hi. Tua hun panin Topa Zeisu pen Ama kumpigam ah i om' theih nadingin vantung ah hong thuumsak hi. Hun bei hun ahi tu laitak in sihna atun ding mawhna nusia-in ama piak nuntak tawntungna a teel dingin Khazih in Ama' Kha tungtawn in hong khal hi. Mawhna ven' theihna pen Pasion in a kisik kik ding-a hong sapna i sang ding hi lel hi (*Hosea 6*).

Nung kaal in mawhnei eite pen Khazih lo-in tang' om le'hang khua mial sungah lampai tawh kibang hi cih sin hi hang (*1 John 1:6*). Tu kaal ah bel khuamial panin Pasion' khuavak ah koici pai ding hiam cih sin ding hi hang (*1 John 1:7*). Zeisu Khazih sunga Pasion' hehpihna lo-in i mawhna kimai lo ding a ei' pen mawhna le sihna sila kihi ding hi (*Pian. 2:17; Rom. 5:12*). Tu kaal lesson ah Khazih tawh pang khawm in Pasion hong piak khong a lamdang hehpihna thu en ding hi hang (*Pai. 34:1-10*). Hih letsong lo-in Adam le Eve te' mawhna a bawl uh ciangin guaktang ahih manun mai a zum dan tawh kibang ding hi hang (*Pian. 3:7*). Tu kaal ah, Pasion' hehpihna in a kisik Adam le Eve a tuam' mah bangin ei hong tuam hi cihthu en ding hi hang (*Pian. 3:21; Mang. 7:13-17; Matt. 22:12*).

**Khen II: Hilhcianna**

**A kisikkik dingin Pasion thuumna (*Hosea 6*).** *Shub* kici Hebrew kammal pen a “kilehkik” pumpi tatzia gen hi. Hih verb pen kha thu-a “kisikkikna” thu ah zong zangh hi.

*Shub* pen Hosea bu ah kizangh mahmah kammal hi. Abu bup ah kisik kikna thu mah gen pen hi. *Shub* pen kizuak-a a pasal a nusia Hosea zi Gomer kilehkikna gen hi (*Hosea 2:7*). A pasal tung ah Gomer' cihtakloh

na in Pasion tung ah Israelte' cihtaklohna limla hi. Tua hi-a *shub* pen Israelte Pasion lam ah ciahkik (*kisik*) a gen'na zong suak hi (*Hos. 3:5*).

Hosea alian 6 sungah verb *shub* "ciahkik" pen aneu 1 pek-in kidawk pah-a Israelte Pasion mai-ah kisik aci hi-in alian 6 tawpna ah dawkkik hi (*Hos. 6:11*). Hih danin kigelhna in saltaan'na pan ciahkik kha ding kam ciamna le Israelte kisikna nazom hi. Kamsangpa le a citaklo a zi kikaal thu pen Israel zong Pasion tung ah citaklo hi cih mitmuh thei thuhilhna hi. Hih mun ah kamsangpa in Israelte' zawnkhal dan pen humpi nelkai in a sa mat abal' dan-in (*Hos. 5:14*) Pasion in Israelte a thehthan'na thu phawk sak hi (*Hos. 6:1*). Tualeh kamsangpa in Pasion in Israelte ni thum ni ciangin no suah sak ding hi ci-in kamciam hi, hih pen Pasion in Israelte khalam khanglo sak ding cihna hi.

Tanglai-in amaute teen'na mun ah (Near East), misi khat pen ni thum khit a muan ciangin a si-in sim uh hi. "Ni thum" cih pen sihna pan thawhkikna cihna khat hi. Tua thu thuciam thak ah Zeisu Khazih thawh kikna thu kigenna ah kizangh hi. "Lai Siangtho in a gen mah bangun a ni thum ni-in a thokik hi" (*1 Cor. 15:4*). (Tanglai Judah ni sim dan pen ni thu a cihleh ni thum a cing dan in sim uh hi). Israel' thawh kikna le Khazih' thawhkikna tegeel ah Israel thawh kikna pen (saltaanna pan ciahkikna) pen Khazih' tawhkikna lim la bek hilo hi. Thuciam Thak lam pan in bel tua thawhkikna thu nih tegeel ah Pasion in a Tapa a thawhkik sak bangun (*1 Cor. 15:20; 1 Cor. 15:23 tawh saikaak in*), kisikna in Pasion in a mite "tha nei sakkik ding" ci kamciam kiksak hi cih kha thu lesson laak ding zong kihel hi.

**Pasion' khuavak sungah Kalsuan un (*1 John 1:5-10*).** Hosea bu sungah Pasion in kisikkik ding, Ama lamah a kalsuan ding a khohna za hi hang. John laikhak sungah Pasion in Ama' khuavak sungah kalsuan dingin khoh na za hi hang. John' lai pen "a kipatcil a" cih tawh pan a leitung kipian' sakna hemgen hi "nuntakna Thu tawh kisai" (*1John 1:1*). Tua thukawng mah John' gelh Lungdamna Thu ah zong kimu-a, "A kipatcil in" (*John 1:1*) in ci-in Piansilna bu-a kammal masa ahi *bere'shit* "Akipatcil in" tawh na kibang hi (*John 1:1; Pian. 1:1 tawh saikaak in*). John' gelh Lungdamna bu sungah khuavak le nuntakna na bulh khawm hi "Nuntakna a nei khempeuh in tua Thu tung panin a nuntakna uh ngah a, tua nuntakna in mi khempeuh tungah khuavak hong tun'p'ih hi" (*John 1:4*). Tua bang mah in John in a laikhak sungah nuntakna ii Pasion pen (*1 John 1:1, 2*) pen khuavak Pasion naci hi (*1 John 1:5*). John in leitung kipiansakna thu

pen Pasion' khuavak sungah kalsuanna gau suaksak hi. Pasion pen – Piangsakpa le nuntakna Naak – khuavak ahilhmanin Ama khuavak sungah i kalsuan loh phamawh hi (*1 John 1:7*). Adan-a thulaak ding ahang pen Pasion' khuavak ah ki-om keileh ei pen khuamial sungah om, lampi maan mu zolo ding cihbek hilo-in ei pen mawhnei kihi ding-a thu huhau-in Khazih hong sawpsiang'na le mawhmai sakna kisam mahmah hi cih thu ah kinga hi (*1 John 1:9*). John in ei khempeuh in mawh khin hi ci hi. Kua mah in mawh keng' citheilo hi (*1 John 1:10*).

Thuhilhsia bu sungah zong tu thu mah mu hi hang. Pilna lunggulh-a a zon' kawikawi khitciangin (*Ths. 7:10-18*), Solomon in mihing' kanzawh thu tawh pilna kimu zolo hi ci hi (*Ths. 7:23*). Solomon in a nuntak sungin a muhkhiat thu khat bekbek pen “Pasion in mihing a thutang dingin bawl a, ahi zongin mite in ngimna tuamtuam a zong uh hi” ci hi (*Ths. 7:29*). Tua hi-a Thuhilhsia bu in leitung ah ei khempeuh pen mawh nei vive kihi -a hotkhiat a ngah taak cing ding khat mahmah omlo ci hi (*Ths. 7:20*). Tua ahilhmanin Solomon in hih gen'theihna pan suaktaak thei nading pen Pasion bek tawh suakta thei ci hi (*Ths. 7:18*).

**Pasion' zia (*Pai. 34:1-10*).** Kilemkikna bawlna in Pasion in hong pan masa hi. Amah'n ei mawhna hong maisak hi. Tua pen Israelte' kham bawnglim a biak khit uhteh tuak uhhi (*Pai. 32:1-6*). Hih “mawhna lianpi” in Pasion tawh kikhen sak hi. Kua mihing ta gamtat, ciangtaak mahmah in van le lei kikaal leidawh zolo hi. Hih kikhenna a kimu thei dingin Moses in Pasion in a khut tawh a gelh Thukham suangpeek suk khapna tawh lak hi (*Pai. 32:12, 16*). Tua khitteh Moses zong mipite' mawhna Pasion in a mai sak dingin thuumsak hi (*Pai. 32:31-35*). Moses in Pasion in a vang' liatna lak sak a (*Pai. 33:18*), a hehpihna lak hi (*Pai. 33:19*). Paikhiatna 34:1-10 pen tua kamciam tangtun'na hi. Hih tak-a Pasion' gente pen a hehpihna bulphuh-a kammal nga tawh kilak hi:

- “Hehpihna” hih pen Hebrew kammal *rekhem* “naubu” cihpan hong pai-a nu' in anau a gil ah a paai, kinai mahmah cihthu lak hi.
- “Aangvan” hihpen na khat “a khong-a” kipia cih lamtawh kisai hi (*khinam*).
- “Lungduai” (abul taktak pen “naak sau”) Pasion' lungduai zawh dan genna hi.
- “Itna kip le thumaan” tua geel kikop in itna le thutan'na kikaal kisai'na genna hi.

Mawh khuh na Ni-ah (*Dan. 7:9-15; Dan. 8:18*), Pasion' hehpihna in a

mite mawh maisak ding, lai nat ding cih kip sak hi.

**Puantual thak** (*Pian. 3:21; Mang. 7:13-17*). Adam le Evete guaktang in om cih a kimuhna uh pen amau a tuam' ngeisa khuavak puan a neih nawn loh man uh hi. Hih khuavak puan pen Pasion lim' langh sak na hi (*Late 8:5; Late 104:1, 2 tawh saikaak in*).

Adam le Eve te'n guaktang ahihna uh amau seel tawm pen Paul in sepkhiatna tawh diktan' sawmna hi ci hi (*Gal. 2:16*). A kiseel tawm man un amau pen Pasion' za atuh hong suak uh hi. Hih tuhna Pasion in a puan ding uh vaan sakna tawh nung lepsak hi (*Pian. 3:21*). Pasion in Adam le Eve te tungah puan a piak thu Piancilna 3:21 sungah na gen-a mihing in puan vaihawm khitna thu phawksak hi (*Pian. 3:7*). Tua "verb" tua "form" mah kizangh hi wayya 'asu/waya'as, "bawl uh"/ "bawlin" (*Pian. 3:7; Pian. 3:21*). Amun nih ah tua 'verb' lian mah kizatna in Pasion bekin mawhna khuh khuan le khuh theihna thu nei hi cihna hi. Pasion in Khazih hong kipiak ding lim ala gan gawh biakpiakna hong pan in hih lesson ei' sungah hong khenkip hi. Pasion in savun a silhsakna pen ganhing pen kithat, kipia cihna hi (*Siam. 5:5-10; 7:8*). Kipiakhia savun puan in mihing bawltawm puan' mun hongla-in Messiah hong pai ding limciing hi.

Piancilna tangthu sungah Pasion in puan a kheksak pen mailam ading thu teeng sak hi. Alim in ah Pasion in mailam ah Tuuno' mopawi a siim dingte (*Mang. 19:9; Matt. 22:12 tawh saikaak in*) hotkhiatna a ngahte thutan' na puantual piak ding thu kawk hi.

## **Khen III: Nuntakna-ah Zatpah Ding**

**Siate' ading:** Itna le thutan'na kikaal kizopna pen bang hiam? Hih thu kipat nading na class sung-a khat anuai-a kigen thulu sim khia sak in. Tua khitteh anuai-a dotnate kikum in.

**Ngaihsut ding: Itna le thutan'na (Justice).** Hebrew kam ah *tsedeq* hi-in athu ala zui-in "itna" ahihkeileh "thutan'na" hi kawikawi thei hi.

1. Thutan'na pen itna om keileh bang hangin thutang hilo ding-a, itna zong thutan'na om keileh itna hilo ding ahiam?
2. Hih thumaan thutak tawh kisai Lai Siangtho, leitung tangthu, tu' nai-a thupieng te pan in Sabbath sang hongkahte zong sak in. Amau muh khiatte class sungah pen sak in.